

摘藻堂四庫全書薈要

史部

欽定四庫全書薈要

史部

宋史卷二百七十六

詳校官編修臣王天祿



欽定四庫全書薈要卷五千九百四

史部

宋史卷二百七十六

元中書右丞相總裁托克托等修

宋史列傳第三十五

劉保勲 滕中正 劉鰲 孔承恭

宋璫 袁廓 樊知古 郭載附

臧丙 徐休復 張觀 陳從信

張平 子從吉 王繼升 子昭遠

尹憲王賓安忠

劉保勲字脩業河南人父處讓仕後唐入晉拜樞密使出為彰德軍節度保勲少好騎射後唐清泰中裁十許歲攝潞州左司馬隨父署彰德軍衙內都校父卒補供奉官習刑名之學頗工詩因獻詩宰相桑維翰奇之奏擢為太常丞歷漢為祕書丞周廣順初有薦其詳練法律兼大理正遷工部員外郎歷掌鄆宋楚三州鹽麴商稅宋初拜戶部遭母喪起復出掌蘄口榷茶徙雲安監

鹽制置使歲滿出羨餘百萬轉運使欲以狀聞保勲曰
貪官物為己功可乎乃止開寶初遷司封員外郎監左
藏庫六年知宋州太平興國初遷祠部郎中通判晉州
二年選為江南西路轉運使賜錢百萬三年徙兩浙東
北路太宗征晉陽改戶部郎中為隨軍轉運使兼勾當
北面轉運事又與侯陟同勾當軍前諸事會陝西北路
轉運使雷德驤調發沁州軍糧後期詔劾德驤以保勲
代之太原平命知并州逾年召入判大理寺出知昇州

是冬召歸點檢三司開拆司會鹽鐵使闕又命權領其
事遷兵部郎中兼判三司勾院八年拜右諫議大夫俄
知開封府寡婦劉詣府訴夫主前妻子元吉寘堇食中
毒已將死按驗獄成元吉妻搥登聞鼓訴寃事下御史
臺其實劉有姦狀元吉知之劉慙悸成疾故誣告之保
勲坐奪奉三月俄以辛仲甫代之未幾復判大理寺雍
熙二年權御史中丞兼勾當差遣院是秋罷權中丞三
年春命曹彬等征幽州保勲以本官知幽州行府事子

利涉以開封府兵曹督芻粟隨軍常從其父會王師不利濟拒馬河更相蹂躪多死保勲馬陷淖中利涉自後掇出之力不勝人馬相擠壓遂俱死時年六十二上命恤其後保勲三子二子先保勲死季子隨沒以其孫巨川為嗣授祕書正字端拱初特詔贈工部侍郎保勲性純謹少寐未嘗忤物精於吏事不憚繁劇嘗語人曰吾受君命未嘗辭避接同僚未嘗失意居家積貲未嘗至千錢及死聞者皆痛惜之至道三年又錄其次孫世長

為正字咸平初保勲妻卒詔賜錢十萬巨川累為比部郎中

滕中正字普光青州北海人曾祖瑤高郵令祖照即墨令父保裔興平令中正弱冠舉進士不第周顯德中滑帥向拱奏辟為掌書記拱移鎮彭門會中正丁外艱復表奪情仍署舊職加朝散大夫拱鎮襄陽以中正為襄均房復觀察判官及留守西路又奏署河南府判官檢校戶部員外郎乾德五年度支員外郎侯陟表中正有

材幹入為殿中侍御史兩川平選知興元府判西京留
臺俄通判河南府留守司事太祖霄祀西洛以祗事之
勤轉倉部員外郎太宗即位遷考功員外郎授四川東
路轉運使太平興國五年召為膳部郎中兼侍御史知
雜事六年命與中書舍人鄭贄戶部郎中雷德驤同知
京朝官考課中正嘗薦舉監察御史張白知蔡州假貸
官錢二百貫糴粟麥以射利坐棄市中正降為本曹員
外郎依舊知雜未幾又擢拜右諫議大夫權御史中丞

雍熙元年春大宴上歡甚以虛盞示羣臣宰相言飲酒
過度恐有失儀之責上顧謂中正曰今君臣相遇有失
者勿彈劾也因是伶官盛言宴會之樂上曰朕樂在時
平民安是冬乾明節羣臣上壽酒既三行上目中正曰
三爵之飲實唯常禮朕欲與羣臣更舉一卮可乎中正
曰陛下聖恩甚厚臣敢不奉詔殿上皆稱萬歲二年以
年老辭出知河南府未幾被病罷分司西京淳化初判
留司御史臺命其子元錫權河南司錄以便養二年卒

年八十四中正性峻刻連鞠大獄時議以為深文權中
丞日振舉綱憲人以稱職許之二子並舉進士元錫至
刑部郎中玄晏後名世寧至工部郎中

劉蟠字士龍濱州渤海人漢乾祐二年舉進士解褐益
都主簿宋初歷安遠軍及河陽節度推官保義軍掌書
記乾德五年召拜監察御史典染院事初蘇曉掌京城
市征頗幹集及卒選蟠代之冬命為太宗生辰使開寶
七年與殿中丞劉德言同知淮南諸州轉運事太平興

國初就遷倉部員外郎改轉運使歲漕江東米四百萬斛以給京師頗為稱職秩滿部內僧道乞留詔許再任賜金紫改駕部員外郎八年丁內艱時以諸州綱運留滯起復知京城陸路發運司事會河決韓村大發丁夫塞之命蟠調給其餉未幾河塞朝廷方議封禪以蟠為東封水陸計度轉運使會詔罷其禮儀遷工部郎中充河北水路轉運使改刑部郎中就充水陸轉運使入判本部事籍田畢遷左諫議大夫淳化初兼同考京朝官

差遣二年暴中風眩上遣太醫視之賜以金丹卒年七十三賜錢十萬給其喪事蟠性清介寡合能攻苦食淡專事苛刻好設奇詐以售知人主典染作日太祖多臨視之蟠傾車駕至輒衣短後衣芒屨持挺以督役頭蓬不治遽出迎謁太祖以為勤事賜錢二十萬嘗受詔巡茶淮南部民私販者衆蟠乘羸馬偽稱商人抵民家求市茶民家不疑出與之即擒寘於法子錯初以父廕為大理評事咸平二年擢進士第嘗獻章太學頌真宗中

夜觀書得錯頌頗嘉賞之出以示輔臣且言錯幼孤能自立召試命直史館累遷至戶部郎中鹽鐵副使

孔承恭字光祖京兆萬年人唐昭宗東遷舉族隨之遂占籍河南五世祖戡唐書有傳戡孫迥萊州刺史迥子昌庶虞部郎中昌庶子莊仕晉為右諫議大夫由勛至莊皆登進士第承恭莊之子也以門蔭授祕書省正字歷溫安豐二縣主簿時王審琦節制壽陽以承恭名家子奏攝節度推官府罷調補鄭州錄事參軍入為大理

寺丞獻宮詞託意求進太祖怒其引喻非宜免所居官
放歸田里太宗即位以赦復授舊官時初權酒以承恭
監西京酒麴歲增課六千萬遷大理正議獄平允擢庫
部員外郎判大理少卿事遷屯田兵部二郎中同考校
京朝官課第端拱三年下詔曰九寺三監國之羽儀制
度聲名往往而在各有副貳率其司存品秩素高職任
尤重郎吏遷授斯為舊章比聞縉紳之流頗以臺閣自
許目為散地甚無謂焉朕將振之自我而始其以兵部

郎中孔承恭為太常少卿魏羽為祕書少監戶部郎中
柴成務為光祿少卿魏庠為衛尉少卿張洎為太僕少
卿呂端為大理少卿臧丙為司農少卿袁廓為鴻臚少
卿工部郎中張雍為太府少卿又以屯田郎中雷有終
為少府少監虞部郎中索湘為將作少監時裴祚慎從
吉宋雍先為少卿皆改授東宮官又詔承恭與左散騎
常侍徐鉉刊正道書俄以疾求解官且言早遊嵩少間
樂其風土願卜居焉上召見哀其羸瘠出御藥賜之授

將作監致仕以其子玠同學究出身為登封縣尉俾就
祿養未果行而卒年六十二承恭少踈縱及長能折節
自勵嘗上疏請令州縣長吏詢訪耆老求知民間疾苦
吏治得失及舉令文賤避貴少避長輕避重去避來請
詔京兆并諸州於要害處設木牌刻其字違者論如律
上皆為行之尤奉佛多蔬食所得奉祿大半以飯僧嘗
勸上不殺人又請於征戰地修寺及普度僧尼人多言
其迂濶云

宋璫字寶臣華州渭南人父鸞監察御史璫乾德中進士及第拔萃登科解褐青城主簿好寫書秩滿載數千卷以歸吳廷祚鎮永興辟掌書奏廷祚卒復調下邳主簿擢著作佐郎知綿州太宗即位改右贊善大夫為峽路轉運副使代還召對賜緋魚復出知秦州有善政就拜監察御史充陝西轉運使以韋亶代知秦州璫去州未百日亶坐事繫獄上以璫前有治績賜錢五十萬再命知秦州安集諸戎部內清肅雍熙初轉比部員外郎

在任凡六年召歸面賜金紫授度支判官俄遷屯田郎中知益州屬歲饑多盜璫始至以方略擒捕招輯盜皆首伏屏息下詔嘉獎端拱初就拜右諫議大夫時兩川轉運使副皆坐事免以璫為西川轉運使加左諫議大夫改知陝州淳化中三吳歲饑疾病民多死擇長吏養治之命璫知蘇州璫體豐碩素病足至州地卑濕疾益甚人或勸其謝疾北歸璫曰天子以民病俾我綏撫我以身病而辭焉非臣子之義也既而太白犯南斗曰斗

為吳分民方饑天象如此長吏得無咎乎四年卒年六十一上聞之嗟悼錄其子明遠為蒲城主簿俾護其喪歸葬焉璫性清簡歷官三十年未嘗問家事唯聚書以貽子孫且曰使不忘本也明遠淳化三年進士後為都官員外郎次子柔遠亦舉進士及第垂遠閤門祇候

袁廓劍州梓潼人在蜀舉進士及第入宋補雙流縣主簿又為西平縣主簿勾稽漏籍得民丁萬餘州將薦其勤職就遷上蔡令又以課最擢太子右贊善大夫令於

御史府分領推事掌權貨務廓性夸誕敢大言好詆訐

太祖以奇士待之太宗即位遷殿中丞出知楚州歸掌

京師市征歲中增課數萬緡上嘉之賜緋魚賚錢百萬

會錢俶盡籍土宇以獻命廓按籍浙中諸州軍倉庫之

物悉輸京師得以便宜從事仍詔每公宴別席而坐以

寵異之復命知鄆州會河決溢入城侵居人廬舍至冬

月結為冰廓大發民鑿取以竹輿舁出城散積之使者

至謂其有略致水不入城乃以狀聞拜監察御史至春

凍解州地下流漸溢入為民患會秦王廷美遷置房州以崇儀副使閻彥進知州事廓通判州事並賜白金三百兩廓俄轉殿中侍御史召為戶部判官命與陳恕李惟清專計度芻糧事改戶部員外郎又為度支判官籍田轉本曹郎中判戶部勾院廓強項好爭數與判使等較曲直於上前聲氣俱厲上每優容之然勾稽精密由是部領擁積為郡吏所訴詔御史辨問廓謁見宰相趙普自理屬鄭州團練使侯莫陳利用得罪廓嘗與利用

書札往還稔昵普謂之曰職司常事此不足云與利用
交結款密於理可乎廓驚慙泣下不能對數日出知溫
州就遷鴻臚少卿同郡袁仁甫掌州之闕征素以宗盟
之分頗相親善一旦不協互有論奏上遣光祿寺丞牛
韶往按驗韶至竝攝繫獄置對上疑廓被誣驛召赴闕
廓性剛褊被詰治峻急詔書未至以憤死上聞甚追悼
之復驗仁甫所訴多無實狀免韶官貶仁甫商州長史
贈廓右諫議大夫錄其子邱賀為奉禮郎始十歲上猶

念廓不已又詔削仁甫名籍配隸商州

樊知古字仲師其先京兆長安人曾祖偁濮州司戶參
軍祖知諭事吳為金壇令父潛事李景任漢陽石埭二
縣令因家池州知古嘗舉進士不第遂謀北歸迺漁釣
采石江上數月乘小舟載絲繩維南岸疾棹抵北岸以
度江之廣狹開寶三年詣闕上書言江南可取狀以求
進用太祖令送學士院賜試本科及第解褐舒州軍事
推官嘗啟於上言老母親屬數十口在江南恐為李煜

所害願迎至治所即詔煜令遣之煜方聞命即厚給齎裝護送至境上七年召拜太子右贊善大夫會王師征江表知古為鄉導下池州八年以知古領州事先是州民保險為寇知古擊之連拔二砦擒其魁以獻餘皆潰散方議南征命高品石全振往湖南造黃黑龍船以大艦載巨竹絙自荆南而下遣八作使郭守濬算率丁匠營之議者以謂江濤險壯恐不能就乃於石碑口試造之移至采石三日橋成不差尺寸從知古之請也金陵

平擢拜侍御史令乘傳按行江南諸州詢訪利民復命知江東南路轉運事數日改授江南轉運使賜錢一百萬先是江南諸州官市茶十分之八復征其餘分然後給符聽其所往商人苦之知古請蠲其稅仍差增所市之直以便於民江南舊用鐵錢十當銅錢之一物價翔踴民不便知古亦奏罷之先是李煜用兵權宜調歛知古悉奏為常額豫章洪氏嘗掌昇州權酤運鐵錢數百萬至是知古挾微時常辱於洪氏責償銅錢以快意太

宗即位授庫部員外郎召歸換金紫賜錢百萬命為京
西北路轉運使太平興國六年加虞部郎中就改知邠
州移鳳翔府入為鹽鐵判官出領荊湖轉運使雍熙初
遷比部郎中會河朔用兵分諸郡為兩路以給漕輓遷
知古為東路轉運使遷駕部郎中賜錢五十萬知古本
名若水字叔清因召見上問之曰卿名出何書對曰唐
尚書右丞倪若水亮直臣竊慕之上笑曰可改名知古
知古頓首奉詔倪若水實名若水知古學淺妄引以對

人皆笑之端拱初遷右諫議大夫河北東西路轉運使
賜白金千兩兩路各置轉運副使都轉運使之名自知
古始二年詔加河北西路招置營田使奏請修城木五
百餘萬牛革三百萬上曰萬里長城豈在於此自古匈
奴黃河互為中國之患朕自即位以來或疆場無事則
有修築圩堤之役近者邊烽稍警則黃河安流無害此
蓋天意更迭垂戒常令惕勵然而預備不虞古之善教
深溝高壘亦王公設險之義也所請過當不亦重困吾

民乎乃詔有司量以官物給之會度支使李惟清上言
河北軍儲無備請發河南十七軍州轉粟以赴太宗謂
農事方殷豈可更興此役惟清固以為請上遣左正言
馮拯乘傳與知古計之知古即言河北軍儲可以均濟
足俟農隙令民轉餉拯復命太宗曰不細籌之則民果
受弊矣未幾入朝奏事稱旨拜給事中俄為戶部使知
古有才力累任轉運使甚得時譽及在戶部頻以職事
不治詔書切責名益減素與陳恕親善恕時參知政事

太宗言及計司事有乖違者恕具以告後因奏事知古
遂自解上問從何得知曰陳恕告臣上怒恕泄禁中語
且嫉知古輕佻故兩罷之出知古知梓州未至改西川
轉運使知古自以嘗任三司使一旦掌漕運劍外鬱鬱
不得志嘗稱足疾未嘗按行郡縣蜀中富饒羅紈錦綺
等物甲天下言事者競商權利又土狹民稠耕種不
足給繇是兼并者益糴賤販貴以規利淳化中青城縣
民王小波聚衆為亂謂其衆曰吾疾貧富不均今為汝

輩均之附者益衆遂攻陷青城縣掠彭山殺其令齊元振巡檢使張玘與鬪于江源縣射小波中其額旋病創死玘亦被殺衆遂推小波妻弟李順為帥初小波黨與纔百人州縣失於備禦故所在蠭起至萬餘人攻蜀州殺監軍王亮及官吏十餘人陷邛州害知州桑保紳通判王從式及諸僚吏逐都巡檢使郭允能允能率麾下與戰新津江口為賊所殺同巡檢殿直毛儼徒步以身免賊勢益張衆至數萬人陷永康軍雙流新津溫江郫

縣縱火大掠留其黨守之往攻成都燒西郭門不利引去陷漢州彭州旋陷成都時已詔知梓州右諫議大夫張雍代知古為轉運使雍未至知古與知府郭載及屬官走東川詔復令掌兩川漕運知古具伏擅離所部制置無狀上特宥之以本官出知均州視事旬日憂悸卒年五十二上猶嗟憫賜其子漢公同學究出身知古明俊有吏幹辭辨捷給及在西川不能弭盜而逃雖獲宥終以慙死云

郭載字咸熙開封浚儀人父暉右監門衛將軍義州刺史載蔭為右班殿直累遷供奉官閤門祇候雍熙初提舉西川兵馬捕盜事太宗賜鞍馬器械銀錢以遣之四年以積勞加崇儀副使召還上言川峽富人俗多贅壻死則與其子均分其財故貧者多詔禁之端拱二年擢引進副使知天雄軍人同勾當三班出知秦州兼沿邊都巡檢使先是巡邊者多領兵騎以威戎人所至頗煩苦之載悉減去戎人感悅遷西上閤門使改知成都府

載在天雄軍屢奏市糴朝臣段獻可馮侃等所市麤惡
軍人皆曰此物安可充食太宗頗疑使覆驗之及報與
載奏同獻可等皆坐削官仍令填償及載受代獻可等
所市皆支畢復有羨數三司判勾馮拯以聞太宗召度
支使魏羽詰之羽曰獻可等所市不至麤惡亦無欠數
臣與侃親舊是以未敢白太宗曰此公事爾何用畏避
因召宰相謂曰此乃郭載力奏朕累與卿等議皆云有
實今支畢頗有羨餘軍士復無詞訴郭載朕向以誠純

待之何為矯誣及此然已委西川候還日別當詰責於
是獻可等悉復官載行至梓州時李順已搆亂有日者
潜告載曰益州必陷公往當受禍少留數日可免載怒
曰吾受詔領方面阽危之際豈敢遷延邪即日入成都
順兵攻城益急不能拒守乃與樊知古率僚屬斬關出
以餘衆由梓州趨劔門隨招安使王繼恩統兵討順平
之復入成都月餘憂患成病卒年四十載前在蜀頗能
為民除害故蜀民悅之再至成都即值兵亂及隨繼恩

平賊亦有所全濟故其死也成都人多歎惜之

臧丙字夢壽大名人弱冠好學太平興國初舉進士解褐大理評事通判大寧監官課民煮井為鹽丙職兼總其事先是官給錢市薪吏多侵年致歲課不充坐械繫者常數十百人丙至召井戶面付以錢既而市薪山積歲鹽致有羨數太宗平晉陽以丙為右贊善大夫知遼州丙素剛果有吏幹會同年生馮汝士以祕書丞知石州與監軍不協一夕剗刃於腹而死事可疑丙上疏言

汝士死非自殺乞按治上覽奏驚駭即遣使鞠之召丙
問狀丙曰汝士居牧守之任不聞有私罪而言自殺若
使冤死不明不加宿直者以罪今後書生不能治邊郡
矣上嘉其直改著作郎俄遷右拾遺直史館加工部員
外郎充河東轉運使俄兼本路管田使代歸授戶部郎
中同知審官院朝廷方以九等亞列為重改司農少卿
淳化二年拜右諫議大夫出知江陵府歲餘疾上聞之
遣中使及尚醫馳往視之踰月卒年五十三上軫悼之

以其子待用為四門助教丙舊名愚字仲回既孤嘗夢其父召丙偶立於庭向空指曰老人星見矣丙仰視之黃明潤大因望而拜既寤私喜曰吉祥也以壽星出丙入丁乃改名焉至是無驗丙於禮不當更名古人戒數占夢無妄喜也待用歷金部郎中東染院使賀州刺史次子列進士及第至太常丞

徐休復字廣初濮州鄆城人太平興國初舉進士解褐大理評事通判轉運使薦其才代歸授太子右贊善大

夫改著作郎直史館賜緋魚遷左拾遺六年加右補闕
充兩浙東北路轉運副使移知明州七年秋被召赴闕
明年授庫部員外郎知制誥九年出知廣州是歲加水
部郎中雍熙二年就遷比部郎中充樞密直學士賜金
紫依舊知州事休復與轉運使王延範不協乃奏延範
私養術士厚待過客撫部下吏有恩發書與故人韋務
昇作隱語傾朝廷事反狀已具詔遣內侍閻承翰與休
復同按劾之遂抵於法端拱初加左諫議大夫召為戶

部使淳化元年罷使遷給事中連知青潞二州休復先
上言以父母藁葬青社願得領州事因營丘壠至青州
踰年但聚財殖貨終不言葬事至潞州數月瘍生於腦
既而疾甚若見王延範休復但號呼稱死罪後數日卒
年五十三休復無他能掌誥命甚不稱職履行不見稱
於搢紳云

張觀字仲賓常州毗陵人在江南登進士第歸宋為彭
原主簿太平興國初移興元府掾復舉進士不第調鷄

澤主簿再求試特授忠武掌書記就改觀察判官上請
復刺史及不遣武德卒詣外州偵事頗稱旨召拜監察
御史充桂陽監使獻所業文賜進士及第會三司言劍
外賦稅輕詔觀乘傳按行諸州因令稍增之觀上疏言
遠民不宜輕動撓因而撫之猶慮其失所況增賦以擾
之乎設使積粟流行用輸京師愈煩漕輓之力固不可
也或以分兵就食亦非安存之策徒歛怨於民未見國
家之利太宗深以為然因留不遣其後復上疏曰臣憑

藉光寵備位風憲每遇百官起居日分立於庭司察不
如儀者舉之因見陛下天慈優容多與近臣論政德音
往復頗亦煩勞至於有司職官承意將順簿書叢脞咸
以上聞豈徒褻黷至尊實亦輕紊國體況帝王之道言
則左史書之動則右史書之列於緇素垂為軌範不可
不慎也若夫方今之急者遠人未服邊鄙不寧陰陽未
序倉廩猶虛淳朴未還奢風尚熾縣道未治逋逃尚多
刑法未措禁令猶密墜典未復封祀猶闕凡此數者皆

朝廷之急務也誠願陛下聽斷之暇宴息之餘體貌大
臣以之揚摧使沃心造膝極意論思則治體化源何所
不至臣又嘗讀唐史見貞觀初始置崇文館命學士者
儒更直互進聽朝之際則入內殿講論文義商榷時政
或日旰忘倦或宵分始罷書諸信史垂為不朽況陛下
左右前後皆端士偉人伏望釋循常之務養浩然之氣
深詔近臣闡揚元風上為祖宗播無疆之休下為子孫
建不拔之業與夫較量金穀剖析毫釐以有限之光陰

役無涯之細務者安可同年而語哉上覽而稱之召賜
緋魚以為度支判官歲餘遷左司改鹽鐵判官嘗因奏
事白上曰陛下務敦淳化殿宇米飾皆徹去之惟尚朴
素天下幸甚然於服御器用臣願亦從純儉上曰朕庶
事簡約至於所服多用絕絹皆經澣濯爾卿言甚善觀
頰首謝觀數在省署及長春殿次中詔事於其使李惟
清辨說牴牾失禮容惟清不能甘因奏解其任觀抗章
論列上亦察其無失故未幾復授舊職又諫罷治佛寺

不報俄出為諸路茶鹽制置副使上疏言更茶鹽之制
於理非便不合旨改知黃州遷揚州皆有善政會三司
改舊貫均州縣之籍以分其職召為三司河東道判官
有詔計司官屬不得越局言他事觀自以任諫官乃上
書指陳拾遺補闕之職言事固當然不奉詔上怒謂宰
相曰朕俾警三司僚屬各率其職非令諫官不言時務
觀乃妄有援引以諷刺朕姑為容忍不欲深責乃令出
知道州移廣南西路轉運使坐奏交州黎桓為亂兵所

殺丁濬復位事不實被劾獄未具卒於桂州年五十三
觀廣覽漢史雅好論事辭理切直有古人之風焉

論曰保勲從其子以死事宋璫忘其身以恤民臧丙信
友誼以明枉其所履歷皆有足觀中正粗振風紀而峻
深寡怨袁廓剛捐夸誕以微寵任承恭平恕知止而好
佞佛固皆未盡於善知古首獻征南之謀遂階試用而
其攬轡舊都猶尋宿怨與昔人所謂不以私怨惡廢鄉
黨之好者異矣郭載肆為矯誣而懷恚以死休復虧慎

終之孝而樂致人於禍庸何議焉若觀之獻納忠讜識達體要則又可嘉者也

陳從信字思齊亳州永城人恭謹強記心計精敏太宗在晉邸令典財用王宮事無大小悉委焉累官右知客押衙開寶三年秋三司言倉儲月給止及明年二月請分屯諸軍盡率民船以資江淮漕運太祖大怒責之曰國無九年之蓄曰不足爾不素計而使倉儲垂盡乃請屯兵括民船以運是可卒致乎今設汝安用苟有所闕

當罪汝以謝衆三司使楚昭輔懼詣太宗求寬釋使得盡力太宗既許召從信問之對曰從信嘗遊楚泗知糧運之患良以舟人之食日歷郡縣勘給是以凝滯若自發舟計日往復併支可以責其程限又楚泗運米於舟至京復輦入倉宜宿脩運卒令即時出納如此每運可減數十日楚泗至京千里舊八十日一運一歲三運若去淹留之虛日則歲可增一運焉今三司欲籍民舟若不許則無以責辦許之則冬中京師薪炭殆絕矣不若

募舟之堅者漕糧其損敗者任載薪炭則公私俱濟今
市米騰貴官價斗錢七十賈者失利無敢致於京師雖
居商厚儲亦匿而不糶是以米益貴民將餓殍若聽民
自便即四方奔湊米多而價自賤矣太宗明日具奏太
祖可之其事果集焉太宗即位遷東上閤門使充樞密
都承旨會八作副使綦廷珪因疾假滿不落籍愈日不
朝參即入班中宣徽使潘美王仁贍並坐奪奉一季從
信與閤門使商鳳責授閑廐使閤門祇候餘抵罪有差

太平興國三年改左衛將軍復為樞密都承旨太宗征并汾以為大內副部署七年坐秦王廷美事以本官罷明年分使三部以從信為度支使賜第於浚儀寶積坊加右衛大將軍九年卒年七十三贈太尉從信好方術有李八百者自言八百歲從信事之甚謹冀傳其術竟無所得又侯莫陳利用者所為多不法始因從信推薦人以是少之

張平青州臨朐人弱冠寓單州依刺史羅金山金山移

滁州署平馬步都虞候太宗尹京兆置其邸及秦王廷
美領貴州復署為親吏後數年有訴平匿府中錢物秦
王白太宗鞠之無狀秦王益不喜遂遣去太宗憐其非
罪以屬徐帥高繼冲繼冲署為鎮將平歎曰吾命雖蹇
後未必不為福也太宗即位召補右班殿直監市木秦
隴平悉更新制建都務計水陸之費以春秋二時聯巨
筏自渭達河歷砥柱以集於京期歲之間良材山積太
宗嘉其功遷供奉官監陽平都木務兼造船塲舊官造

舟既成以河流湍悍備其漂失凡一舟調三戶守之歲後戶數千平遂穿池引水繫舟其中不復調民有寇陽拔華者往來關輔間為患積年朝廷命內侍督數州兵討之不克平以好辭遣人說之遂來歸改崇儀副使仍領其務凡九年計省官錢八十萬緡雍熙初召還同知三班事遷如京使三年改西上閤門使纔三月又改客省使四年代王明為鹽鐵使平掌陽平署積年是秋聞陝西轉運使李安發其舊為陽平姦利憂恚成疾而卒

年六十三廢朝贈右千牛衛上將軍官給葬具平好史傳微時遇異書盡日耽玩或解衣易之及貴聚書數千卷在彭門日郡吏有侮平者數輩後悉被罪配京窯務平子從式適董其役見之以語平平召至第為設酒饌勞之曰公等不幸偶罹斯患慎勿以前為念給以緡錢且戒從式善視之未幾遇赦得原時人稱其寬厚從式事太宗藩邸累官文思使次子從吉以蔭補殿直轉供奉官知宜州屢破溪蠻轉運使堯叟上其狀累遷內殿

崇班閤門祗候在任凡八年代還為如京副使咸平中
知環州嘗與宋沆率兵襲西夏小衄部署張凝表其專
責授內殿崇班俄知澧州復舊秩景德四年宜州軍校
陳進叛命副曹利用為廣南東西路安撫使將兵討之
次象州大烏砦與賊戰進為先鋒郭志言所刺遂入城
斬首六十級以平賊功改莊宅副使未還卒年四十九
王繼升冀州阜城人性純質謹愿事太宗於藩邸太宗
信任之即位補供奉官累遷軍器庫副使陳洪進來獻

漳泉之地以繼升為泉州兵馬都監會游洋洞民萬餘
叛攻泉繼升潛率精騎二百夜擊破之擒其魁械送闕
下餘黨悉平召還遷軍器庫使領順州刺史知諸道陸
路發運事雍熙四年以諸道水陸發運併為一司命繼
升與刑部員外郎董儼同掌其事號為稱職俄遷右神
武軍將軍端拱初改領本州團練使三月卒年六十四
太宗頗嗟悼贈洋州觀察使葬事官給子昭遠
昭遠形質魁偉色黑繼升名之鐵山有膂力善騎射少

時入山捕鷹鵝值澗水暴漲十餘丈昭遠升大樹經宿
得免嘗涉河冰陷二公傍共援出之昭遠神色自若喜
與里中惡少遊處一日衆祀里神昭遠適至有以博投
授之謂曰汝他日儻有節鉞試擲以卜之昭遠一擲六
齒皆赤南遊京師事太宗於晉邸特被親遇常呼其小
字及即位補殿前指揮使稍遷都知從征太原先登為
流矢所中血漬甲縷戰益急會劉繼元降命守城門籍
兵仗又從征范陽多所擒獲超散員指揮使涪王之遷

房陵也禁衛諸校楊均王榮等以依附被譴獨昭遠無所預太宗以為忠再遷東四班都虞候轉殿前班都指揮使領寰州刺史改馬步軍都軍頭命乘傳鎮定高陽關募兵以備契丹又為冀州駐泊都監俄授澤州團練使洺州都部署太宗屢稱其能可備急使端拱初名為殿前都虞候領勤州防禦使命有司治綾錦院為公署掘地得闕鐵若山形或言此地即鐵山故營又與昭遠幼名合聞者異之太宗嘗草書紈扇作古詩賜諸將意

多比諷其賜昭遠尤加賞遇二年領沙州觀察使再為
并代副都部署至道中李繼遷擾西鄙絕靈武糧道命
昭遠為靈州路都部署護二十五州芻粟竟達靈武繼
遷不敢犯真宗即位徙定州行營都部署未幾拜保靜
軍節度使充天雄軍都部署知府事咸平二年移知河
陽數月卒年五十六時車駕在大名為廢朝贈太尉謚
惠和中使護葬昭遠頗知書性吝嗇所至無善政母弟
昭懿亦事晉邸至捧日都虞候弟昭遜西京作坊使初

祖母郭氏嘗對昭遠母指昭遠曰此兒有貴相他日必至公侯指昭懿曰此兒奉錢過二萬不能勝矣果皆如其言昭遠子懷普九歲事太宗左右至西京左藏庫使平州刺史懷一供備庫副使懷正內殿承制懷英內殿崇班

尹憲并州晉陽人開寶中事太宗於藩邸太宗即位擢為殿直充延州保安軍使改供奉官太平興國四年護府州屯兵與鄜州三族會攻嵐州破敵千餘衆擒偽知

嵐州事馬延忠拔緣河諸砦以功轉西京作坊副使入朔州界破寧武軍殺其軍使獲人馬器甲甚衆改護夏州兵轉供備庫使殺戮三汭醜奴莊宥伽羅膩葉十四族及誘其渠帥屢降詔書褒美雍熙初詔就知夏州攻破李繼遷之衆于地斤澤繼遷遁走俘獲四百餘帳奏請於所部抽移諸帳別置騎兵號曰平砦以備其用詔從之俄殺蘆關及南山野狸數族諸族遂擾代還為洪州巡檢未幾命護莫州屯兵三年詔知瀛州兼兵馬鈐

轄領富州刺史遷東上閤門使端拱二年知滄州移邢
州皆兼鈐轄淳化初與王文寶並命為四方館使連護
鎮定州屯兵改知貝州移高陽關兵馬鈐轄五年知定
州與兵馬部署王榮不協榮素粗暴因忿毆憲仆地憲
怏怏致疾數日卒年六十三

王賓許州許田人小心謹愿年十餘事宣祖左右及長
善騎射太宗領兗海節制太祖以署府中右職太平興
國初補東頭供奉官亳州監軍賓妻妬悍賓不能制時

監軍不許挈家至任所妻擅至亳賓具白上太宗召其妻俾衛士梓之杖百以妻忠靖卒一夕死遷賓儀鑾副使領內酒坊從征太原又從征范陽與彰信節度劉遇攻城東面五年車駕北巡副王仁贍為大內都部署七年改洛苑使會汴漕壅滯軍食不給詔別置水陸發運兩司以賓有心計會領演州刺史與儒州刺史許昌裔同掌其事凡四年儲積增羨號為稱職俄改右神武將軍黎陽當舟車交會禁兵常屯萬餘以度支使張遜薦

命賓護黎陽軍兼領黃御兩河發運事俄領本州團練
使以賓請黎陽建通利軍命就知軍事賓規起公署郵
館供帳之罷咸具加本軍大將軍歲別給錢二百萬俄
兼河北水陸路轉運使貝州兵屯無壁壘分寓邸肆賓
選隙地築舍千二百餘以處之優詔褒美召為右羽林
軍大將軍判左金吾兼六軍諸衛儀仗司事淳化四年
出知揚州兼淮南發運使徙為通許鎮都監至道元年
卒年七十三賻贈加等賓事宣祖太祖太宗殆六十年

最為勤舊故恩寵尤異前後賜賚數千萬俱奉釋氏在
黎陽日按見古寺基即以奉錢修之掘地丈餘得數石
佛及石碣有賓姓名賓異其事以聞詔名寺為淳化賜
新印經一藏錢三百萬以助之

安忠河南洛陽人祖叔千仕晉累任方鎮以太子太師
致仕父延韜左清道率府率忠形質魁岸不知書纔通
姓名而已事太宗藩邸殆二十年太宗即位授東頭供
奉官掌弓箭庫遷內弓箭庫副使西京作坊使掌翰林

司內衣庫提點醫官院掌屯兵于雍州會曹彬敗于拒
馬河忠分砦兵布列緣邊以備游騎又鑿河葺城壁俄
徙威虜軍又隸鎮定路大陣之左相就擢東上閤門使
與大將李繼隆田重進崔翰追契丹兵祁州北詔書獎
飭端拱元年移護高陽關屯兵契丹侵鎮定又與崔翰
拒之傳潛陣于瀛州忠當城之西面二年徙知壽州踰
月移貝州有劇賊十二人久為民患忠捕之悉獲淳化
四年判左金吾街仗王賓出知揚州以忠代為左龍武

軍大將軍忠泣請諸衛將軍列在朝外不得近左右願復舊職上笑曰環列之官古官也大將軍三品汝終不知朝廷表著之位因從其請俄復東上閣門使充淮南諸州兵馬鈐轄至道三年以病求歸至泗州卒年六十四天禧元年錄其孫惟慶為殿直

論曰太宗居潛左右必求忠厚彊幹之士及即位修舊卹之功陳從信張平王繼升尹憲王賓安忠六人者咸備任使又皆畀以兵食之重寄而各振舉其職焉有足

稱者矣然平不修舊怨度幾進於士夫之度從信所進
邪佞以術蠱惑上心猶不免於近侍之常態歟

宋史卷二百七十六

欽定四庫全書薈要卷五千九百五

史部

宋史卷二百七十七

元中書右丞相總裁托克托等修

列傳第三十六

張鑑

姚坦

索湘

宋太初

盧之翰

鄭文寶

王子輿

劉綜

卞袞

許驥

裴莊

牛冕

張適附

樂崇吉

袁逢吉

韓國華

何蒙

慎知禮

子從吉

張鑑字德明瀛州團練使藏英之孫父裔以蔭補供奉
官鑑本將家幼能嗜學入衛州霖落山肄業凡十餘年
太平興國三年擢進士第釋褐大理評事監泰州紫墟
榷務升朝為太子右贊善大夫知婺州就遷著作郎還
拜監察御史奉詔決獄江左頗雪冤滯歷殿中侍御史
會命曹彬等進討幽州問羣臣以方略鑑上疏極言不
可論者以鑑燕人沮議非忠也太宗置不問與趙延進

同掌左藏延進恃恩踰規鑑廷奏之有旨罷延進以鑑判三司度支憑由催欠司時三部各置憑由催欠鑑請併為一從之王明李惟清薦其能用為江南轉運使本部有大姓為民患者鑑以名聞太宗盡令部送魁首及妻子赴闕以三班職名羈縻之江左震肅又建議割瑞州清江吉州新淦袁州新喻三縣置臨江軍時以為便召還特被慰獎梓州符昭愿驕僭不法即以鑑代之遷刑部員外郎判大理寺遷屯田郎中判三司都催欠司

改都勾院擢拜樞密直學士知通進銀臺封駁司又掌三班上言供奉官以下不考校殿最恐無沮勸即詔鑑兼磨勘職改三司為左右計分天下為十道鑑奏其非便未幾果復舊淳化中盜起西蜀王繼恩討平之而御軍無政其下恃功暴橫益州張詠密奏請命近臣分屯師旅即遣鑑與西京作坊使馮守規偕往召對後苑門面授方略鑑曰益部新復軍旅不和若聞使命驟至易其戎伍慮或猜懼變生不測請假臣安撫之名太宗稱

善鑑至蜀繼恩猶偃蹇不意朝廷聞其縱肆鑑之行付以空名宣頭及廷臣數人鑑與詠即遣部戌卒出境繼恩麾下使臣亦多遣東還督繼恩輩分路討捕殘寇而鑑等招輯反側事平歸朝未至拜左諫議大夫戶部使會五路進兵討西夏令鑑乘傳往環州與李繼隆議護送芻糧入靈州及還上疏曰關輔之民數年以來併有科役畜產蕩盡室廬頓空加以浦洛之行曾經剽劫原州之役又至遷延非獨令之弗從實緣力所不逮況復

先棄糧草見今逐處追科本戶稅租互遣他州送納往返千里費耗十倍愁苦怨嘆充塞路歧自春徂冬曾無暫息餽糧之絕力用殫窮顧此疲羸尤堪軫恤今若復有差率益致流亡縱令驅迫必恐撓潰願陛下特垂詔旨無使重勞因茲首春俾務東作况靈州一方僻居絕塞雖西陲之舊地實中夏之蠹區竭物力以供須困甲兵而援送蕭然空壘祇益外虞不若以賜繼遷使懷恩奉籍稍息飛輓之役事當深慮理要預防若待川決而

後防火熾而方戢則焚溺之患深矣雖欲拯救其可得乎尋詔鑑專督軍糧以軍興法從事饋運頗集真宗即位遷給事中使如故咸平初改工部侍郎出知廣州居二年民條其政績上請刻石三年移知朗州溪洞羣蠻數寇擾鑑召酋豪諭以威信皆俯伏聽命初鑑在南海李夷庚為通判謝德權為巡檢皆與之不協二人密言鑑以貲付海賈往來貿易故徙小郡至是鑑自陳有親故謫瓊州每以奉米附商舶寄贍之又言夷庚德權愼

人貪凶之狀上意稍釋召還以疾徙知相州有芝草生於監牧之室鑑表其祥異以為河朔弭兵款附之兆優詔答之景德初卒年五十八子士庶為殿中丞士宗太子洗馬士程屯田員外郎

姚坦字明白曹州濟陰人開寶中以尚書擢第調補將陵尉歷隰州推官將作監丞知潯州太平興國三年召還為著作佐郎通判唐州八年諸王出閣詔給諫以上於朝班中舉年五十以上通經有文行者以脩官僚乃

以戶部員外郎王適監察御史趙齊為衛王府諮議左
贊善大夫戴元為本府翊善水部員外郎趙令圖為廣
平郡王府諮議國子博士閻象為本府翊善又以起居
舍人楊可法國子博士楊幼英左贊善大夫杜新及坦
為皇子翊善國子博士邢昺為諸王府侍講坦仍賜緋
魚太宗召王適等謂曰諸子生長深宮未知世務必資
良士贊導使日聞忠孝之道汝等皆朕所慎簡各宜勉
之坦歷殿中丞倉部員外郎賜金紫遷本曹郎中轉考

功仍為益王府翊善坦性木強固滯王嘗於邸中為假山費數百萬既成召賓僚樂飲置酒共觀之坦獨俛首王強使視之曰但見血山耳安得假山王驚問故坦曰在田舍時見州縣催科捕人父子兄弟送縣鞭笞流血被體此假山皆民租稅所為非血山而何是時太宗亦為假山聞而毀之王少佚豫坦即醜詆王頗鄙其為人自是坦每暴揚其事上嘗戒之曰元傑知書好學亦足為賢王矣少不中節亦須婉辭規諷況無大故而詆訐

之豈裨贊之道邪頃之左右乃教王詐稱疾不朝太宗
日使視疾逾月不瘳甚憂之召王乳母問狀乳母曰王
本無疾徒以姚坦檢束居常不得自便王不樂故成疾
上怒曰吾選端士輔王為善王不能用其諫而又詐疾
欲使朕去正人以自便何可得也且王年少必爾輩為
之謀耳因命捽至後苑杖之數十召坦慰諭曰卿居王
宮能以正為羣小所疾大為不易卿但如是勿慮讒間
朕必不聽王薨改衛尉少卿判吏部南曹他日因事得

對上以其舊人召升殿與語坦言及故府意短諸王而稱已之敢言坦退上謂侍臣曰坦在官邸不能以正理誨諭事有微失即從而揚之此賣直取名耳景德初求補郡俾知鄧州轉運使表其治狀詔嘉獎之大中祥符初復知光州二年卒年七十五

索湘字巨川澧州鹽山人開寶六年進士釋褐鄆州司理參軍齊州有大獄連逮者千五百人有司不能決湘受詔推鞠事隨以白太平興國四年轉運使和峴薦其

能遷太僕寺丞充度支巡官改太子右贊善大夫轉殿
中丞充推官拜監察御史九年河決壞民田命與戶部
推官元玘同按行會詔下東封與劉縡同知泰山路轉
運事又為河北轉運副使相經度供餽以能幹聞事集
加屯田員外郎明年契丹入寇王師衄於君子館敵兵
乘勝據中渡橋塞土門將趨鎮州諸將計議未定湘為
田重進畫謀結大陣東行聲言會高陽關兵敵以為然
即擁衆邀我于平虜城夜二鼓率兵而南徑入鎮陽據

唐河乘其無備破砦柵及敵兵覺悉遁走雍熙中召為
鹽鐵判官改駕部員外郎端拱二年河北治方田命副
樊知古為招置營田使會議罷復為河北轉運使轉虞
部郎中選為將作少監居無何有訟其擅易庫緡以自
用者坐授膳部員外郎知相州時有羣盜聚西山下謀
斷澶州河橋入攻磁相州援旗伐鼓白晝抄劫鄰郡發
兵千人捕逐無敢近湘擇州軍得精銳三百人偵其入
境即掩擊而盡擒之轉運使王嗣宗出狀聞詔復舊官

命為河東轉運使湘以忻州推官石宗道憲州錄事胡則為幹職命以自隨所至州郡勾檢其簿領焉二人後皆歷清要明年王超等率師趨烏白池抵無定河水源涸絕軍士渴乏時湘已輦大鋤千枝至令鑿井衆賴以濟真宗即位入為右諫議大夫復充河北轉運使屬郡民有幹釀歲輸課甚微而不逞輩因之為姦盜湘奏廢之德州舊賦民馬以給驛又役民為步遞湘代以官馬兵卒人皆便之會內殿崇班閻自新建議請於靜戎威

虜兩軍置場鬻茶收其利以資軍用湘言非便遂止又
言事者請許榷場商旅以茶藥等物販易於北界北界
商旅許於雄霸州市易資其懋遷庶息邊患詔湘詳議
以聞乃上言曰北邊自興置榷場商旅輻湊制置深得
其宜今若許其交相販易則沿邊商人深入戎界竊為
非便又北界商人若至雄霸其中或雜姦偽何由辨明
況邊民易動難安番戎之情宜為羈制望且仍舊為便
會有詔規度復修定州新樂蒲陰兩縣湘以其地迫窄

非屯兵之所遂奏罷之湘少文而長於吏事歷邊郡所
至必廣儲蓄為脩豫計出入軍旅間頗著能名先是邊
州置榷場與番夷互市而自京輦物貨以充之其中茶
茗最為煩擾復道遠多損敗湘建議請許商賈緣江載
茶詣邊郡入中既免道途之耗復有征筭之益又威虜
靜戎軍歲燒緣邊草地以虞南牧言事者又請於北砦
山麓中興置銀冶湘以為召寇亦奏罷之咸平二年入
為戶部使受詔詳定三司編敕坐與王扶交相請托擅

易板籍責授將作少監三年出知許州徙荆南復為右
諫議大夫知廣州四年卒詔遣其子希顏護喪傳置歸
鄉里

宋太初字永初澤州晉城人太平興國三年舉進士解
褐大理評事通判戎州以善政聞有詔褒美遷將作監
丞贊善大夫通判晉州轉太常丞雍熙三年通判成都
府賜緋魚會詔求直言著守成箴以獻淳化初遷監察
御史時北面用兵選為雄州通判入判度支勾院二年

為京西轉運副使未幾移河東四年遷正使改殿中御史至道初遷兵部員外郎充鹽鐵副使賜金紫時陳恕為使太初有所規畫必咨恕未嘗自用為功恕甚德之會西鄙有警轉饋艱急改刑部郎中充陝西轉運使二年命白守榮馬紹忠護芻糧分三番抵靈州轉運副使盧之翰違旨併往為戎人所剽上怒捕太初及副使秘書丞竇玘繫獄太初責懷州團練副使之翰玘悉除名之翰貶許州司馬玘商州司戶掾明年起太初為祠部

郎中知梓州俄復舊秩真宗嗣位召還復命經度陝西
餽運事咸平初拜右諫議大夫知江陵府蠻寇擾動太
初以便宜制遏詔獎之三年再知梓州明年益州雷有
終以母老求還詔太初就代時分川陝為四路各置轉
運使上以事有緩急難於均濟命太初為四路都轉運
使要切之務俾同規畫太初與鈐轄楊懷忠頗不協時
蜀土始安上慮其臨事矛盾亟召太初還會御史中丞
趙昌言等坐事被劾命權御史中丞先是按劾有罪必

豫請朝旨太初以為失風憲體獄成然後聞上時論題之俄出知杭州太初有宿疾以浙右卑濕不便求近地得廬州疾久頗昏忘不能治大郡連徙汝光二州景德四年卒年六十二錄其弟繼讓試校書郎太初性周慎所至有幹職譽嘗著簡譚三十八篇自序略曰廣平生纂文史老釋之學嘗謂禮之中庸伯陽之自然釋氏之無為其歸一也喜以古聖道契當世之事而患未博也忽外物觸於耳目內機發於性情因筆而簡之以備闕

忘耳子傳慶後為太子中舍

盧之翰字維周祁州人曾祖元暉鴻臚卿祖知誨天雄軍掌書記父完蔡州防禦判官之翰少篤學家貧客遊單州防禦使劉乙館於門下乙徙錢塘之翰隨寓其郡太平興國四年舉進士不得解詣登聞自陳詔聽附京兆府解試明年登第解褐大理評事知臨安縣三遷殿中丞通判洛州會契丹入寇之翰募城中丁壯決漳御河以固城壁敵不能攻吏民詣闕求借留召還遷太常

博士為河東轉運副使徙京西轉運副使改工部員外郎建議導湟河合于淮達許州以便漕運以勞加戶部員外郎又改陝西轉運使遷吏部員外郎至道初李順亂蜀命兼西川安撫轉運使賊平還任之翰嘗薦李憲為大理丞憲坐賊抵死之翰當削三任時副使鄭文寶議城清遠軍又禁番商貨鹽之翰心知其非便以文寶方任事不敢異其議及文寶得罪之翰併前愆左授國子博士領使如故尋復舊職會調發芻糧輸靈州詔分

三道護送命洛苑使白守榮馬紹忠領其事之翰違旨
擅併為一為李繼遷邀擊于浦洛河大失輜重詔國子
博士王用和乘傳逮捕繫獄鞫問之翰坐除名貶許州
司馬明年起為工部員外郎同勾當陝西轉運使真宗
即位復吏部員外郎充轉運使以久次召拜禮部郎中
賜金紫復遣之任咸平元年以疾命國子博士張志言
代還未幾復出為京西轉運使先是朝廷議城故原州
以張守脩之翰沮罷之其後西鄙不寧修葺為鎮戎軍

之翰坐橫議非便黜知歸州便道之官限五日即發三年授廣南西路轉運使會廣州索湘卒就改太常少卿知州事之翰無廡稱又與轉運使凌策不協陰發其事五年徙知永州未行卒年五十七

鄭文寶字仲賢右千牛衛大將軍彥華之子彥華初事李煜文寶以蔭授奉禮郎掌煜子清源公仲寓書籍遷校書郎入宋煜以環衛奉朝請文寶欲一見慮衛者難之乃被簑荷笠以漁者見陳聖主寬宥之意宜謹節奉

上勿為他慮煜忠之後補廣文館生深為李昉所知太平興國八年登進士第除修武主簿遷大理評事知梓州錄事參軍事州將表薦轉光祿寺丞留一歲代歸獻所著文召試翰林改著作佐郎通判潁州丁外艱起知州事召拜殿中丞使川陝均稅次渝涪聞夔州廣武卒謀亂乃乘舸泛江一夕數百里以計平之授陝西轉運副使許便宜從事會歲歉誘豪民出粟三萬斛活饑民八萬六千口既而李順亂西蜀秦隴賊趙包聚徒數千

將趨劔閣以附之文寶移書蜀郡分兵討襲獲其渠魁
餘黨殲焉文寶前後自環慶部糧越旱海入靈武者十
二次曉達番情習其語經由部落每宿酋長帳中其人
或呼為父遷太常博士內侍方保吉出使陝右頗恣橫
且言文寶與陳堯叟交遊為薦其弟堯佐驛召令辨對
途中上書自明太宗察其事坐保吉罪厚賜文寶而遣
之俄又召至闕下文寶奏對捷辨上深眷遇俄加工部
員外郎時龍猛卒戍環慶七年不得代思歸謀亂文寶

矯詔以庫金給將士且自劾請代償詔蠲其所費先是諸羌部落樹藝殊少但用池鹽與邊民交易穀麥會餽輒趨靈州為繼遷所鈔文寶建議以為銀夏之北千里不毛但以販青白鹽為命爾請禁之許商人販安邑解縣兩池鹽於陝西以濟民食官獲其利而戎益困繼遷可不戰而屈乃詔自陝以西有敢私市者皆抵死募告者差定其罪行之數月犯者益衆戎人之食相率寇邊屠小康堡內屬萬餘帳亦叛商人販兩池鹽少利多取

他徑出唐鄧襄汝間邀善價吏不能禁關隴民無鹽以
食境上騷擾上知其事遣知制誥錢若水馳傳視之悉
除其禁召諸族撫諭之乃定朝廷議城古威州遣內侍
馮從順訪於文寶文寶言威州在清遠軍西北八十里
樂山之西唐大中時靈武朱叔明收長樂州邠寧張君
緒收六關即其地也故壘未圯水甘土沃有良木薪秸
之利約葫蘆臨洮二河壓明沙蕭關兩戍東控五原北
固峽口足以襟帶西涼咽喉靈武城之便然環州至伯

魚伯魚抵青岡青岡拒清遠皆兩舍而清遠當羣山之
口扼塞門之要芻車野宿行旅頓絕威州隔城東隅堅
石盤互不可浚池城中舊乏井脉又飛鳥泉去城尚千
餘步一旦緣邊警急賊引平夏勝兵三千據清遠之衝
乘高守險數百人守環州甜水谷獨家原傳箭野貍十
族脇從山中熟戶党項孰敢不從又分千騎守磧北清
遠軍之口即自環至靈七百里之地非國家所有豈威
州可禦哉請先建伯魚青岡清遠三城為頓師歸重之

地古人有言金城湯池非粟不能守俟二年間秦民息
肩臣請建營田積粟實邊之策修五原故城專三池鹽
利以金帛啖党項酋豪子弟使為朝廷用不唯安朔方
制豎子至於經營安西綏復河湟此其漸也詔從其議
文寶至賀蘭山下見唐室營田舊制建議興復可得秔
稻萬餘斛減歲運之費清遠據積石嶺在旱海中去靈
環皆三四百里素無水泉文寶發民負水數百里外留
屯數千人又募民以榆槐雜樹及獐狗鴉烏至者厚給

其直地鳥鹵樹皆立枯西民甚苦其役而城之不能守
卒為山水所壞又令寧慶州為水碓亦為山水漂去繼
遷酋長有鬼羅鬼悉俄者文寶以金帛誘之與手書要
約留其長子為質令陰圖繼遷即遣去謂之曰事成朝
廷授汝以刺史文寶又預漆木為函以脩馳獻繼遷之
首又發民曳古碑石詣清遠軍將圖紀功而鬼羅等盡
以事告繼遷繼遷上表請罪上怒文寶猶含容之既而
文寶復請禁鹽邊民冒法抵罪者甚衆太常博士席義

叟決獄陝西廡知其事以語中丞李昌齡昌齡以聞文
寶又奏減解州鹽價未滿歲虧課二十萬貫復為三司
所發乃命鹽鐵副使宋太初為都轉運使代文寶還下
御史臺鞠問具伏下詔切責貶藍山令未幾移枝江令
真宗即位徙京山咸平中召還授殿中丞掌京南榷貨
時慶州發兵護芻糧詣靈州文寶素知山川險易上言
必為繼遷所敗未幾果如其奏轉運使陳緯沒於賊繼
遷進陷清遠軍時文寶丁內艱服未闋即命相府召詢

其策畧文寶因獻河西隴右圖叙其地利本末且言靈州可棄時方遣大將王超拔靈武即復文寶工部員外郎為隨軍轉運使至環州或言靈州已陷文寶乃易其服引單騎冒大雪間道抵清遠故城盡得其實遂奏班師就除本路轉運使上疏請再葺清遠軍都部署王漢忠言其好生事遂徙河東轉運使嘗上言管内廣銳兵萬餘難得資糧請徙置近南諸州又欲令強壯戶市馬脩征役宰相李沆等以為廣銳州兵皆本州守城置營

必慮安土重遷徙之即致紛擾又強壯散處鄉落無所
拘轄勒其市馬亦恐非便上復令文寶條對文寶固執
前議且言土人久留恐或生事上曰前令團併軍伍改
置營壁欲其互移本貫行之已久而文寶確陳其利因
命錢若水詳度以聞若水所對與沆等同遂罷之先是
麟府屯重兵皆河東輸餽雖地里甚邇而限河津之阻
土人利於河東民罕至則芻粟增價上嘗訪使邊者言
河裁闊數十步乃詔文寶於府州定羗軍經度置浮橋

人以為便會繼遷圍麟州令乘傳晨夜赴之圍解遷刑部員外郎賜金紫頃之寇準薦其熟西事可脩驅策因復任陝西轉運使嘗出手劄密戒令邊事與僚屬計議勿得過有須索重擾于下後有言其張皇者詔徙京西以朱台符代之景德元年冬契丹犯邊又徙河東文寶安輯所部募鄉兵張邊脩又領番漢兵赴河北手詔褒諭未幾復涖京西契丹請和文寶陳經久之策上嘉之三年召還未至遇疾表求藩郡散秩詔聽不除其籍續

奉養疾以其子鄆州推官於陵為大理寺丞知襄城縣
以便其養大中祥符初改兵部員外郎車駕祠汾陰還
文寶至鄭州請見上以其久疾除忠武軍行軍司馬文
寶不就以前官歸襄城別墅六年卒年六十一文寶好
談方畧以功名為已仕久在西邊參預兵計心有餘而
識不足又不護細行所延薦屬吏至多而未嘗擇也晚
年病廢從子為邑多撓縣政能為詩善篆書工鼓琴有
集二十卷又撰談苑二十卷江表志三卷

王子興字希孟密州莒人曾祖甲以義勇為鄉人所推
唐末淄青徐兗皆南給吳人以拒梁梁得三鎮吳人北
侵益急沂密尤被其害州民聚為八砦以扞寇遂署甲
為八砦都指揮使祖徽襲父職晉末闕帥趙重進掠高

密徽戰沒父璉復嗣其事周世宗平淮陽始去兵即農
厚自封殖子興少業文辭太平興國八年舉進士解褐
北海主簿歷大理評事知臨海縣改光祿寺丞使西蜀
決獄還知興國軍淳化中雷有終為江浙荆湖茶鹽制

置使奏子輿為判官轉太子中允改著作郎江淮兩浙
制置茶鹽就轉太常博士真宗即位遷殿中侍御史因
入對與三司論列利害以子輿為長轉度支員外郎子
輿以每事上計司移報稽滯求兼省職乃命為鹽鐵判
官仍領制置增歲課五十餘萬貫咸平三年就命兼充
淮南轉運使子輿精於吏事久掌茶鹽漕運周知利害
裁量經制公私便之所至郡縣以公事申請者文牒紛
委頃刻待報子輿皆即決遣曾無凝滯明年表求代詔

許自擇子興以下袞劉師道名聞即命袞與師道為轉運使召子興拜右諫議大夫戶部使五年二月方奏事便殿俄疾作仆地命中使掖之以出至第卒以子道宗方幼命三司判官朱台符檢校其家子興止一子而三女皆幼道宗尋卒家寓楚州子興妻劉還父母家子興旅櫬在京師景德中官借船移柩還葬其里鬻京師居第以錢寄楚州官庫以備三女資送從其從弟之請也劉綜字居正河中虞鄉人少依外兄通遠軍使董遵誨

遵誨嘗遣貢馬太祖嘉其敏辨將授三班之職綜自陳
素習詞業願應科舉及還上解真珠盤龍衣以賜遵誨
綜辭曰遵誨人臣安敢當此賜上曰吾委遵誨以方面
不以此為疑也雍熙二年舉進士第解褐邛州軍事推
官就改永康軍判官遷大理評事通判眉州轉太僕寺
丞代還對便殿因言蜀地富庶安寧已久益州長吏望
慎擇其人上嘉之改太子中允未幾李順果為亂復召
見面賜緋魚尋為三門發運司水陸轉運使通判大名

府連丁家艱起知建安軍先是天長軍及揚州六合縣民輸賦非便綜奏請降天長軍為縣隸揚州以六合縣隸建安軍自是民力均濟時淮南轉運使王嗣宗兼發運使規畫多迂滯綜因上言請復置都大發運司專幹其職至道二年遷太常丞職事修舉多稱薦之者咸平初命代王欽若判三司都理欠憑由司出為河北轉運副使上言州縣幕職官以昏耄放罷者其間有實廉謹之士或幼累無託或居止無定全藉祿廩以濟朝夕一

旦停罷則饑寒無依以傷和氣望自今並除致仕官又
言法官斷獄皆引律令之文以定輕重之罪及其奏御
復云慮未得中別取進止殊非一成不變之道且復煩
於聖斷望自今降旨約束不得復然時河北承兵寇之
後民戶凋弊吏部所銓幕職州縣官皆四方之人不習
風俗且有懷土之思以是政事多因循不舉綜建議請
自今並以河朔人充之冀其安居勤於職事夏人擾西
邊環慶大屯士馬詔徙綜為陝西轉運副使轉太常博

士時梁鼎議禁解鹽官自貨鬻乃命綜與杜承睿制置
青白鹽事綜條上利害力言非便卒罷其事時靈州孤
危獻言者或請棄之綜上言曰國家財力雄富士卒精
銳而未能剪除凶孽者誠以賞罰未行而所任非其材
故也今或輕從羣議欲棄靈州是中賊之姦計矣且靈
州民淳土沃為西陲巨屏所宜固守以為扞蔽然後於
蒲洛河遠軍城屯兵積糧為之應援此暫勞永佚之勢
也況鎮戎軍與靈州相接今若棄之則原渭等州益須

設脩較其勞費十倍而多則利害之理昭然可驗矣俄
充轉運使四年又獻議於鎮戎軍置屯田務又錄唐安
國鎮制置城壕鎮戎古記石本以進詔從其請俄詣闕
奏事稱旨賜金紫緡錢五十萬復遣蒞職又嘗言天下
州郡長吏審官皆據資例而授未為得人自今西川荆
湖江浙福建廣南知州或地居津要或戶口繁庶之處
望親加選任其執政舊臣及給舍以上知州處亦擇官
通判又京朝官當任遠官者率以父母未葬為辭意求

規免謂自今父母委未葬者許請告營辦審官投狀並
明言父母已葬方許依例考課違者並罷其官從之五
年拜工部員外郎兼侍御史知雜事六年遷起居舍人
再為河北轉運使時兩河用兵邊事煩急轉漕之任尤
所倚辦綜繼領其職號為詳練至是眷矚甚厚警急之
際輒資其奏處契丹請和乃遣近臣諭以擢用之意景
德三年召拜戶部員外郎樞密直學士勾當三班院綜
言御史員數至少每奉朝請劾制獄多以他官承之甚

秦彞制望詔兩制以上各舉才堪御史者充三院共置
十員若出使按獄所經州郡官吏能否生民利病刑獄
枉濫悉得察舉四年西幸道出河陽境上時節度王顯
被疾還京以綜權知孟州事未幾召還復出知并州以
政績聞州民乞留優詔嘉獎歸朝知審官院改吏禮二
部郎中充職兼知通進銀臺封駁司大中祥符四年館
伴契丹使因作大雪歌以獻即命同知貢舉以李宗諤
代為館伴使俄權知開封府綜以貴要交結富民為之

請求或託為親屬奏授試秩緣此謁見官司頗紊公政
因建議請加抑止又文武官居遠任而家屬寓京師其
子孫弟姪無賴者望嚴行約束并其交游革劾罪從之
七年以老疾求典河中真宗以太寧宮廟長吏奉祠綜
艱於拜起慮不克恭事命知廬州明年罷學士授右諫
議大夫八年卒年六十一綜強敏有吏材所至抑挫豪
右振舉文法時稱幹治然尚氣好勝不為物論所許子
建中正中並贊善大夫弟綽淳化三年進士官刑部郎

中

卞袞字垂象益州成都人父震工為詩舉蜀進士渝州
刺史南光海辟為判官蜀平仍舊職會賊杜承褒率眾
圍城援兵不至震躬率士卒且戰且拒為流矢所中創
甚不能臨軍而州兵重傷卷甲宵遁刺史陳文襲不能
遏賊遂入據郡城以偽官厚賄誘震震皆斬其使賊有
東章者本州兵校也因遣人述朝廷威德諭以禍福章
懼且信因伏兵擊其黨類承褒之眾素不為脩即時大

潰震與文襲分部餘卒夾攻之賊衆遂平文襲坐陷失
州城削籍為民震以前功得贖以虢州錄事參軍卒太
平興國八年袞登進士第累遷大理評事知將樂縣改
光祿寺丞通判泗州遷著作佐郎廣南轉運司承受公
事俄通判宣州淳化中上命采庶僚中庶幹者給御書
印紙俾書課最仍賜實奉以旌異之袞預焉改太常丞
咸平初遷監察御史為淮南轉運副使同荆湖發運使
以幹職聞就加殿中侍御史入判三司開拆司再為淮

南轉運使兼發運使咸平六年併三司使之職而分置副貳以袞為刑部員外郎充鹽鐵副使景德初疽發於背卒年四十五錄其弟宸為臨潁主簿子咸為將作監主簿袞明敏有吏幹累掌財賦清心治局號為稱職然性慘毒掎克嚴峻專事捶楚至有大蟲之號真宗嘗謂近臣曰袞公忠盡瘁無所畏避人罕能及然頃在外任頗傷殘酷所至州縣纖微之過無所容貸大凡督察部下糾逖愆違非有大故所宜矜恕官吏自當畏威懷恩

不敢貳過公家之事亦無不濟乃知為吏之方適中為善也

許驤字允升世家薊州祖信父唐世以財雄邊郡後唐之季唐知契丹將擾邊白其父曰今國政廢弛狄人必乘釁而動則朔易之地民罹其災苟不即去且為所虜矣信以資產富殖不樂他徙唐遂潛齎百金而南未幾晉祖革命果以燕薊賂契丹唐歸路遂絕嘗擁商賈於汴洛間見進士綴行而出竊歎曰生子當令如此因不

復行商卜居睢陽娶李氏女生驤風骨秀異唐曰成吾志矣郡人戚同文以經術聚徒唐攜驤詣之且曰唐頃者不辭父母死有餘恨今拜先生即吾父矣又自念不學思教子以興宗緒此子雖幼願先生成之驤十三能屬文善詞賦唐不識字而罄家產為驤交當時秀彥驤太平興國初詣貢部與呂蒙正齊名太宗尹京頗知之及廷試擢甲科解褐將作監丞通判益州賜錢二十萬遷右贊善大夫五年轉右拾遺直史館改右補闕六年

出為陝府西北路轉運副使會罷副使徙知鄜州召還
為比部員外郎歷知宣昇二州雍熙二年改江南轉運
副使洪吉上供運船水損物主吏懼罪故覆舟鞠獄者
按以欺盜當流死者數百人驤馳往訊問得其情實以
聞多獲輕典優詔褒之又上言刼盜配流遇赦得原還
本鄉讎告捕者多所殺害自今請以隸軍詔可遷正使
端拱初拜主客郎中俄徙知福州累表求還不俟報入
朝召對便殿延問良久改兵部郎中領西川轉運使以

久處外任為辭擢授右諫議大夫就命知益州召歸上
言蜀民淳窳易搖宜擇忠厚者撫之為預脩既而李順
叛衆頗服其先見命知審官院遷御史中丞以疾固讓
不許占謝日命坐勞問出良藥賜之曰此朕所服得驗
者後驤以久病不能振職真宗即位改兵部侍郎屢求
小郡養疾因入朝失儀為御史所糾特詔不問命知單
州咸平二年卒年五十七贈工部尚書賜其子宗壽出
身驤雖無他才畧而人以儒厚長者稱之宗壽後為殿

中丞

裴莊字端已閬州閬中人曾祖琛後唐昭州刺史祖遠
河東觀察支使父全福郾縣令莊在蜀以明經登第歸
宋歷虹縣尉高陵主簿本府召權司理掾轉運使雷德
驤以威望自任嘗巡按至境官屬皆出迎候莊獨視事
本局徐謁道周德驤稱其有守徙權忻州錄事參軍先
是并州恃積軍儲條制甚峻掌出納者嘗十餘人莊代
之獨任其事擢授絳州防禦推官提點并嵐二州緡帛

芻糧改遼州判官仍涖舊局雍熙三年命將巡邊以莊
掌隨軍糧料內客省使楊守一稱薦之授大理寺丞時
遷雲朔降戶於汝洛遣莊安輯之俄通判忻州未上道
會魏咸信出鎮澶州改命通判未踰年咸信表其能遷
太子中允端拱初潘美鎮真定又辟為通判時契丹掠
趙深邊將無功莊上書以為周世宗誅樊愛能何徽二
將遂取淮南克巴蜀願陛下申明紀律無使玩寇又言
緣邊砦柵戍兵既寡戎人易以襲取咸請廢罷以益州

兵會詔建方田莊復上言大役兵師慮生事於邊鄙上
善之淳化三年召訪以邊事稱旨面賜緋魚令授清資
官朔日拜監察御史荆湖南路轉運使未行改三司鹽
鐵判官上疏請給兩省官諫紙又引故事禁屠月勿報
重刑會劉式建議請廢緣江權務莊力言其非便出為
荆湖北路轉運使五年李順亂蜀命與雷有終並兼陝
路隨軍轉運同兵馬事或言莊本蜀人不宜任此上益
以信之許以便宜事平轉殿中侍御史歷工部司封二

員外郎特召問討賊方畧至道二年遣將五路出討李繼遷莊陰料師出無功因請加恩繼遷俟其倔强拒命則按甲塞外俘擒未晚既而諸將果敗績俄遷祠部郎中真宗即位遷度支充河東轉運使上章言慶邠延州通遠軍咸處邊要請武幹如姚內斌董遵誨者任之又言田紹斌嘗陂疑韓崇業本秦王婿程德元始事晉邸初甚親近後疎遠外遷皆懷怨望不宜委以戎寄未幾移知蘇州咸平二年命巡撫江南使還言池州興國軍

得良吏餘無足稱者且言朝廷所命知州通判率以資
考而授至有因循偷安無政術而繼得親民者具素蘊
公罷有政績者偶緣公坐則黜司冗務真偽莫辨僥倖
滋甚自今望慎選其人勿以資格補授有政績者加以
恩禮是年秋契丹犯塞命為河北轉運使時傅潛統大
軍駐定州北莊屢條奏其無謀畧慮或失機會王顯掌
樞密顯與潛俱起攀附頗庇之莊奏至多不報徙知越
州俄傅潛得罪莊因上言顯潛皆非材致誤邊事請行

嚴誅以肅羣議未幾徙知宣州會詔百辟上封直言莊
條列四事一曰去暴征二曰省煩刑三曰擇吏職四曰
敦稼政疏奏詔令開陳其所宜行先後莊對甚悉改司
封郎中景德初安撫兩浙奏能吏二十人慢官者五人
多所升黜又知潞邢二州大中祥符初東封改鴻臚少
卿入判登聞鼓院祀汾陰遷太僕少卿為北嶽加號冊
禮副使撰北行記三卷以獻六年出知襄州明年車駕
幸南京莊以逮事太宗恩例授大府卿權判西京留司

御史臺天禧二年入判刑部以疾分司西京郊祀改光祿卿求歸上都以便醫藥卒年八十一錄其孫慶孫試將作監主簿莊有吏幹頗無清操慷慨敢言太宗獎其忠謹多所聽納好為規畫然寡學術嘗建議請置廣聽院西垣學士聞者嗤之晚年退居製棺槨以自隨喜接賓客終日無倦子真咸平二年進士屯田郎中稷左班殿直閤門祗候

牛冕字君儀徐州彭城人太平興國三年進士解褐將

作監丞通判郴州徙和州加左贊善大夫遷太常丞知
徐州以勤政聞召歸轉監察御史端拱元年召試文章
遷左正言直史館出知潤州徙泉州未至就命為福建
轉運使加左司諫建議廢邵武軍歸化金坑土人便之
至道初召入進秩兵部員外郎知潭州至郡才數日復
召拜兼侍御史知雜事真宗在東宮冕嘗奉使賜生辰
禮幣即位尚記其名改工部郎中永熙陵復土會闕中
丞命為儀仗使時三司各設官局多不均濟冕請合為

一使分設其貳則事務不煩而辦其後卒用冕議咸平
元年選知益州仍拜右諫議大夫兩川自李順平後民
罹困苦未安其業朝廷緩於矜恤故戍卒乘符昭壽之
虐嘯集為亂冕與轉運使張適委城奔漢州詔遣赴闕
至京兆劾其罪並削籍冕流儋州適為連州參軍冕遇
赦移欽英二州歷鄂海二州別駕淮南節度副使大中
祥符初真宗語宰相曰冕素純善黜棄久矣量宜甄叙
即起知連水軍俄復為祠部員外郎卒年六十四子昭

儉至殿中丞

張適者太平興國五年進士任藩郡有治績以廉敏稱為水部員外郎知鄜州獲對太宗喜其詞氣俊邁賜緋魚旋改京東轉運副使加直集賢院一日三被寵渥時人榮之徙西川轉運使坐貶後起為彰信軍節度副使知淮陽軍卒

樂崇吉字世昌開封封丘人少為吏部令史上書言事調補臨淄主簿會令坐贓貶即命崇吉代之復以書判

優等改舒州團練判官未行留為中書刑房堂後官改
太子右贊善大夫出掌揚州權務未幾遷殿中丞復為
堂後官兼提點五房公事崇吉明習文法清白勤事至
道初擢度支員外郎度支副使時以堂後官著作佐郎
楊文質為祕書丞提點五房事上召見謂曰汝見擢用
樂崇吉否當自勗勵崇吉俄加祠部郎中真宗時累擢
為江南轉運使代還判刑部兼鼓司登聞院後遷司農
少卿知洪州有司歲斂民財造舟崇吉至奏罷之以疾

徙濠州遷衛尉少卿以將作監致仕卒子二人源虞部
員外郎沂殿中丞

袁逢吉字延之開封鄆陵人曾祖儀仕唐以軍功至黃
州刺史祖光甫尉氏令父蟾大理評事逢吉四歲能誦
爾雅孝經七歲兼通論語尚書周太祖召見發篇試之
賜束帛以賞其精習開寶八年擢三傳第釋褐清江尉
知州王明薦其能就除豐城令明年又與轉運使張去
華條上治狀以春秋博士召端拱初遷國子博士度支

推官又判戶部勾院度支憑由理欠司淳化中改戶部
判官歷水部司門員外郎出為西京轉運使轉水部郎
中宰相呂蒙正薦其有經術宜任學官會蜀叛方藉其
吏資授西川轉運使至道初徙荆湖北路時賊方平夔
峽猶聚官軍供饋出於荆楚逢吉憚涉遠不赴軍前計
度坐乏糧餉罷職知夔州會遣使川陝採訪因條上知
州通判有治迹者七人逢吉與朱協李虛已薛顏邵曄
查道劉檢預焉皆賜詔褒諭歷司門庫部二郎中咸平

中復為京東轉運使連知福江陳襄四州大中祥符中
權西京留司御史臺徙知汝州以逮事太祖拜鴻臚少
卿七年卒年六十九逢吉性修謹練達時務初鄆州牧
馬草地侵民田數百頃牒訴連上凡五遣使按視不決
逢吉受命往則悉還所侵田民咸德之兄及甫歷京東
峽路轉運副使至駕部郎中逢吉子成務至比部員外
郎京東轉運副使從子楚材至虞部員外郎

韓國華字光弼相州安陽人太平興國二年舉進士解

揭大理評事通判瀘州就遷右贊善大夫代還除彰德
軍節度判官遷著作佐郎監察御史雍熙中假太常少
卿使高麗時太宗將北征以高麗接遼境屢為其所侵
命齎詔諭之且令發兵西會既至其俗頗獷鶩恃險遷
延未即奉詔國華移檄諭以朝廷威德宜亟守臣節否
則天兵東下無以逃責於是俯伏聽命使還賜緋魚雍
熙三年改右拾遺直史館判鼓司登聞院俄充三司開
拆推官四年判本司遷左司諫充鹽鐵判官淳化二年

契丹請和朝議疑其非實遣國華使河朔以察之既至
盡得其詐以聞每歲後苑賞花三館學士皆得預三年
春國華與潘太初因對自言任兩省清官兼計司職不
得侍曲宴願兼館職即日命並直昭文館後二日陪預
苑宴三司屬官兼直館自國華等始未幾授刑部員外
歷判三司勾院復為鹽鐵判官又為左計判官尋都判
三司賜金紫改兵部員外郎屯田郎中京東轉運使徙
陝西路舊制川陝官奉緡悉支鐵錢資用多乏國華奏

增其數加都官郎中入判大理寺改職方郎中以詳定
失中命梁顥代之知河陽潞州轉運使言其善綏輯供
億幹辦詔獎之景德中假祕書監使契丹又為江南巡
撫入權開封府判官真宗朝陵魏咸信自曹州召入扈
從命國華權州事俄改太常少卿出知泉州大中祥符
初遷右諫議大夫四年代還至建州卒於傳舍年五十
五賜其子琬出身國華偉儀觀性純直有時譽子琚琰
琦並進士及第琦相英宗神宗自有傳

何蒙字叔昭洪州人少精春秋左氏傳李煜時舉進士
不第因獻書言事署錄事參軍入宋授洺州推官太平
興國五年調遂寧令時太宗親征契丹還作詩以獻召
見賞歎授右贊善大夫三遷至水部員外郎通判廬州
時郡中火燔廨舍權務俱盡蒙假民器貸鄰郡麴米為
酒既而課增倍戶部使上其狀詔賚緡錢獎之稍遷司
門巡撫使潘慎修薦其材敏驛召至京因面對訪以江
淮茶法蒙條奏利害稱旨賜緡魚及錢十萬後二日復

對又上淮南酒榷便宜特改庫部後賜錢二十萬因命
至淮右提總其事自是歲有美利使還知温州未行留
提舉在京諸司庫務求外任復命知温州坐舉人不當
削一官真宗即位復前資因上言請開淮南鹽禁時卞
袞楊允恭輩方以禁鹽為便共排抑之出知梧州頃之
改水部郎中上所著兵機要類十卷時審官擬知漢陽
軍及引對改知鄂州大中祥符初轉庫部四年加太府
少卿未幾知太平州又知袁州州民多米金蒙建議請

以代租稅上曰若此則農廢業矣不許俄徙濠州六年
上表謝事授光祿少卿致仕命未下卒年七十七

慎知禮衢州信安人父溫其有詞學仕錢俶終元帥府
判官知禮幼好學年十八獻書于俶署校書郎未幾命
為掌書記宋初介俶子惟濟入覲歸署營田副使太平
興國三年從俶歸朝授鴻臚卿歷知陳州興元府知禮
母年八十餘居宛丘懇求歸養退處十年縉紳稱其孝
及母服除表請納祿至道三年以工部侍郎致仕知禮

自幼至白首歲讀五經周而後止每開卷必正衣冠危坐未嘗少懈焉咸平初卒年七十七子從吉

從吉字慶之錢俶之婿也為元帥府長史歸宋歷將作少監會擇朝士有望者補少列改太子右庶子真宗升儲換衛尉少卿真宗即位復為右庶子遷詹事從吉自歸朝居散秩幾三十年頗以文酒自娛士大夫多與之游景德初上言求領事務判刑部頗留意法律條上便宜天下所奏成案率多糾駁取本司所積負犯人告身

鬻之以市什器大中祥符初改授衛尉卿糾察在京刑
獄拜右諫議大夫判吏部銓初選人試判多籍地而坐
從吉以公錢市筦席給之臨事敏速勤心公家所至務
皦察多請對陳事上謂其無隱八年改給事中權知開
封府既受命召戒之曰京府浩穰凡事太速則誤太緩
則滯惟須酌中耳請屬一無所受才數月有咸平縣民
張斌妻盧氏訴姪質被酒詬悖張素豪族質本養子而
証左明白質賄于吏從吉于大理寺丞銳時督運石塘

河往來咸平為請于縣宰斷復質劉姓第令與盧同居
質洎盧迭為訟縣聞於府從吉命戶曹參軍呂楷就縣
推問盧之從叔號畧尉昭一賂白金三百兩於楷楷久
不決盧兄文質又納錢七十萬于從吉長子大理寺丞
鈞鈞以其事白從吉而隱其所受盧又詣府列訴即下
其事右軍巡院昭一兄澄嘗以手書達錢惟演云寄語
從吉事逮鈞銳請緩之從吉頗疑懼密請付御史臺即
詔御史王奇直史館梁固鞠之獄成從吉坐削給事勒

停惟演罷翰林學士楷鈞免官配隸衡郢州銳文質皆
削一官澄昭一並決杖配隸又高清者庫部郎中士寵
之子景德中舉進士宰相寇準以弟之女妻之寇氏卒
故相李沆家復婚之歷官以賄聞頗恃姻援驕縱被服
如公侯家以是欺蠹小民知太康縣民有詣府訴家產
者清納其賄時已罷任即逃居他所銳嘗就清貸白金
七十兩清以多納賄賂事將敗求以為助時方鞫盧氏
獄從吉請對發其事欲以自解逮清等繫獄命比部員

外郎劉宗吉御史江仲甫劾之清枉法當死特杖脊黥面配沙門島銳又削衛尉寺丞從吉坐首露在已發當贖銅特削諫議大夫天禧三年起為衛尉卿明年判登聞鼓院坐與寇準善以光祿卿致仕未幾卒年七十從吉喜為詩時有警語兼工醫術子孫登仕者甚衆第進士升朝曳朱紱數人家富於財尤能治生多作負販罷僦賃以至鬻棺槨於市又善為饌具分遺權要晚年進趨彌篤以至于敗物論鄙之子鏞金部度支員外郎祕


閣校理楷太常博士

論曰八政之首食貨以國家之經費不可一日而無也然生之有道而用之有節則存乎其人焉爾張鑑將命西蜀處制得宜庶乎可與行權者也子輿裁損經制索湘議罷鬻茶許驤謹守儒行知禮篤信經學國華不辱君命皆有足稱者焉太初自謂達性命之蘊而卒流於釋老之歸文寶久任邊郡而不免以生事蒙絀劉綜著勞朔易而短於經術從吉勤於公務而疎於訓子固未

得為盡善也自餘諸子之翰虧潔白之操卞袞之仁恕之道冕之棄其城守坦之疎於輔導則君子所不取也



宋史卷二百七十七



總校官庶吉士

臣

張能照

校對官庶吉士

臣

陳墉

謄錄監生

臣

薛翰

謄錄監生

臣

江軾